



Kursus tak relevan dimansuh setiap tahun

Oleh **Nas Norziela Nasbah** - November 8, 2022 @ 4:00pm
bhpendidikan@bh.com.my



Banyak program yang ditawarkan di UA dan IPTS dimansuhkan atau dihentikan hampir setiap tahun kerana tidak popular atau tidak relevan dengan kehendak pasaran. Gambar BERNAMA

Sesuai dengan keperluan semasa dan faktor kebolehpasaran banyak program yang ditawarkan di universiti awam (UA) dan institut pengajian tinggi swasta (IPTS) dimansuhkan atau dihentikan hampir setiap tahun.

Julai lalu misalnya, Universiti Malaya (UM) menghentikan 20 program akademiknya, manakala Universiti Utara Malaysia (UUM) turut melaksanakan tindakan serupa.

Antara program yang dihentikan adalah Diploma Siswazah Sains Koreksional; Ijazah Sarjana Pentadbiran Perniagaan (Perakuanan) dan Diploma Siswazah Dalam Pendidikan.

Hujung tahun lalu juga, UM dan empat universiti awam (UA) turut menghentikan penawaran 55 kursus berkaitan kejuruteraan atas faktor yang sama. Empat UA itu termasuklah Universiti Teknologi Mara (UiTM), Universiti Teknikal Malaysia Melaka (UTeM) dan Universiti Malaysia Sarawak (UNIMAS). Pemberhentian kursus yang sama turut dilakukan tujuh IPTS.

Jumlah itu adalah sebahagian daripada 85 program akademik di 20 UA yang dilupuskan. Daripada jumlah itu, 17 membabitkan pengajian peringkat sarjana muda, manakala bakinya adalah program sarjana dan doktor falsafah.

Dalam konteks dunia pendidikan, pemansuhan atau pemberhentian tawaran satu-satu kursus adalah amalan biasa. Umumnya ia dikaitkan dengan faktor kebolehpasaran dan keperluan semasa selain beberapa faktor lain termasuk popularitinya dalam kalangan pelajar.

Ketua Pengarah Pendidikan Tinggi, Datuk Prof Husaini Omar, secara umum semua UA dan IPTS kerap melakukan semakan kursus akademik yang ditawarkan, justeru bukan luar biasa pelupusan program berlaku setiap tahun.

"Semakan program akademik ini dibuat selepas mendapat nasihat daripada Jawatankuasa Penasihat Industri yang mana setiap program itu mempunyai jawatankuasanya sendiri.

"Tindakan menghentikan sesuatu program atau memperkenalkan yang baharu bukanlah asing dalam dunia akademik. Pastinya, banyak faktor sudah diambil kira sebelum perkara itu dilakukan," katanya.

Husaini berkata, faktor utama pelupusan program di UA disebabkan bukan sahaja ia tidak relevan dengan perkembangan teknologi dan industri, malah tidak popular dalam kalangan pelajar menyebabkan permohonannya sangat rendah.

Bagaimanapun katanya, terdapat beberapa faktor lain yang turut diambil kira dalam proses menghentikan, pembekuan dan pelupusan program akademik berkenaan.

"Selain faktor kebolehpasaran graduan dan populariti akademik program, ia juga dipengaruhi unjuran pengambilan pelajar; guna tenaga kerja negara; senarai pekerjaan kritikal yang dikeluarkan oleh Talent Corp; data Pertubuhan Keselamatan Sosial (PERKESO) dan juga Jabatan Perangkaan Malaysia (DOSM).

"Keputusan untuk menghentikan sesuatu program perlu melalui beberapa proses yang ketat.

"Selepas UA atau IPTS mengenal pasti program akademik yang hendak dilupuskan, ia perlu mendapatkan kelulusan daripada Senat universiti dan Jawatankuasa Pendidikan Tinggi (JKPT), Kementerian Pengajian Tinggi (KPT).

"Keahlian JKPT ini termasuklah wakil daripada Jabatan Perkhidmatan Awam (JPA), Lembaga Pembangunan Pelaburan Malaysia (MIDA), Talent Corp, PERKESO, Perbadanan Ekonomi Digital Malaysia (MDEC), Perbadanan Tabung Pendidikan Tinggi Nasional (PTPTN), Badan Profesional dan Unit Perancangan Ekonomi (EPU)," katanya.

Tegasnya, IPTS turut menjalani proses yang sama sekiranya mahu mengubah dan menambah baik mana-mana program yang ditawarkan atau memperkenalkan program baharu.

"Sebagai contoh, ada UA atau IPTS merekabentuk semula program yang mereka tawarkan. Ia dilakukan dengan menjadikannya program rentas disiplin atau program sarjana dan doktor falsafah diganti mod penawaran yang berbeza atau digabungkan dengan program lain.

"Merekabentuk semula program yang ditawarkan itu bukan sahaja bagi memastikan ia mampu berdaya saing, tetapi bagi menjamin kemampanan program akademik itu sendiri," katanya.

Ujar beliau lagi, dalam hal ini KPT berharap setiap institut pengajian tinggi perlu memastikan kursus yang ingin ditawarkan itu relevan dengan kehendak semasa dan membuat semakan setiap lima tahun sekali.

Selain itu katanya, bagi program baharu yang ingin ditawarkan, ia perlu mendapatkan kelulusan menerusi pengakreditasi Agensi Kelayakan Malaysia (MQA) supaya ia mencapai kualiti yang ditetapkan.

Bagaimanapun terdapat sebahagian program yang dikekalkan meskipun ia dianggap tiada nilai 'kebolehpasaran' antaranya program berkaitan sejarah dan sastera. Dalam konteks ini, tindakan mengekalkan program berkenaan amatlah penting disebabkan keperluannya terhadap kajian kemasyarakatan, kenegaraan dan warisan bangsa.

Sementara itu, Ketua Pegawai Eksekutif MQA, Prof Datuk Dr Mohammad Shatar Sabran, berkata setiap institut pengajian tinggi mempunyai kebebasan untuk menawarkan, menutup dan menarik kursus yang dirasakan sesuai atau sebaliknya.

Bagaimanapun mereka perlu membuat semakan semula lima tahun sekali setiap program pengajian yang ditawarkan berdasarkan peraturan ditetapkan MQA.

"Semakan ini perlu dibuat berdasarkan keperluan yang diperlukan pihak majikan di luar sana.

"Sekiranya didapati keperluan tidak ada, universiti boleh membuat keputusan untuk tidak lagi menawarkan program berkenaan.

"Begitu juga dengan program baharu, sebelum ia dikemukakan kepada pihak MQA, mereka perlu melaksanakan kajian pasaran untuk menunjukkan justifikasi mengapa ia perlu ditawarkan," katanya.

Mohammad Shatar berkata lagi, MQA sentiasa mengambil berat dalam aspek kualiti merangkumi pelbagai aspek termasuklah kebolehpasaran graduan sekiranya ia tidak menyakinkan maka sesuatu program itu tidak diluluskan.

"Dalam konteks kualiti, semua program yang ditawarkan di IPT dalam negara sudahpun mencapai tahap kualiti yang baik, diiktiraf pada peringkat antarabangsa.

"Bukan sekadar dalam konteks pengajaran dan pembelajaran, kemudahan tetapi ia juga merangkumi sejauh mana produk atau keluaran graduan dalam program diikuti mendapat tempat dalam pasaran kerjaya.

"Justeru, program yang ditawarkan pada hari ini, tidak menjadi isu atau masalah kerana ia sudah diambil kira dalam semua aspek berkaitan oleh pihak MQA dan KPT sendiri," tegasnya.